



Rabu, 23 Pebruari 2022
Ogen: Markus 1:35-39



Ku Ingin Simelenget



Lit kuan-kan si rusur ibelasken singuda-nguda anak perana tupung ia duana ndalani masa-masa berpacaran nina, *dunia ini serasa milik kita berdua*. Meriah kal akapna tupung ia jumpa, kurangsa akapna rusur waktu jumpa. E maka ndarami wari libur usur gelah banci jumpa. Waktu dua-dua e rusur ipakena guna cerita masa lalu si erbahansa ia banci tawa duana, banci ka ia nuri-nuri kerna pengalaman ras perbeben nggeluh, banci ka nuriken kekurangan ras kelemahenna gelah banci min isampati. Adi dua-dua bebas kal nuriken kai saja si lit i bas pusuh. Suasana dua-dua lit lainna ras adi pulung enterem-enterem. Dahin e pe adi dua kalak ndahikensa pedas dung entah mbelin bekas, adi dua kalak lit teman si sampat-sampaten, lit teman nuri-nuri, lit teman arih. Adi dua kalak la melungun, la gechap latih.

Jesus i bas menai dahinNa teptep wari, ibahanNa lebe waktuna dua-dua ras Bapana. Ercakap-cakap IA ras Bapana, nuri-nuri kerna kai ateNa si ibahnNa. I bas IA dua-dua e banci saja Jesus mindo penampat, mindo pengkawali, mindo gegeh. nehken sura-sura ras sidebanna. Ibiasaken Jesus erbahan paksa dua-dua ras Bapana teptep wari.

Si ibiasaken Jesus enda perlu kal iusih kerina Moria. Waktu berdua labo terjeng ras perbulangen ngenca perlu tapi pe ras Bapa i surga. Reh rusurna kita jumpa reh bagesna ateta tedeh. Perjumpanta ras Dibata e, sada kesempatan banta nuriken isi pusuhta, nuriken sura-suranta, bage pe nuriken kelepakenta. Perjumpanta ras Dibata e pe banci ka kesempatan megiken sura-sura Tuhan, arah kita ngoge Pustaka. Kesah Tuhan mabai kita lalap ngangakai sura-suraNa dengen mereken gegeh banta ngelakokensa. Gegeh si mbaru lako ngukuri ras ngelakoken si mehuli tiap wari sialoken ras e me jadi asamta ndalani wari-wari si iberekenNa banta.